

Perumahan jadi masalah yang mendesak: KM

PULAU PINANG, Khamis — Pulau Pinang sedang mengalami kadar perkembangan yang pesat, sehingga pelaksanaan projek-projek pembangunannya menimbulkan masalah dan perkembangan yang baru.

Ketua Menteri, Pulau Pinang Dr Lim Chong Eu berkata keadaan tersebut memerlukan penyelarasan yang lebih rapi dari berbagai jabatan kerajaan di samping sokongan berterusan dari rakyat.

Dr Lim menarik per-

Oleh ZAINAL A.

hatian bagaimana dalam tempoh sepuluh tahun lalu, masyarakat negeri ini terdedah kepada isu-isu pertikaian berhubung peluang-peluang pekerjaan.

"Tetapi sekarang kerajaan menghadapi masalah menyediakan kemudahan perumahan yang mencukupi untuk rakyat," kata Dr Lim semasa berucap di majlis jamuan makan malam Kerajaan Negeri meraikan Pemangku Perdana Menteri, Datuk Musa Hitam di kediaman beliau di sini malam ini.

Dr. Lim mengakui bahawa isu menyediakan perumahan yang mencukupi merupakan satu masalah sosio-ekonomi semasa yang sungguh mendesak.

Bellau berkata, walaupun Kerajaan Negeri menambahkan keupayaan membina sejumlah 5,000 unit rumah awam setahun, permintaan perumahan sudah menjadi begitu besar sehingga kerajaan hanya mampu memenuhi kadar 10 peratus saja dari keperluan rakyat.

Pertikaian

Menurut Dr Lim, Kos pembinaan rumah semakin melambung menyebabkan masalah tersebut semakin menjadi pertikaian rakyat di negeri ini.

Bagaimanapun ujar Dr. Lim, kerajaan mempunyai keyakinan bagi mengatasi masalah tersebut seperti yang telah dilakukan dalam mengatasi peluang pekerjaan tahun tujuh puluhan.

"Kami akan mengukuhkan perkembangan sektor perindustrian dengan menitikberatkan projek-projek yang akan menarik industri-industri yang memerlukan kemahiran dan teknologi yang lebih tinggi sambil meningkatkan industri-industri tempatan yang sedia ada di negeri ini melalui usaha sama," tambah bellau.

Ketua Menteri berkata, Kerajaan Negeri dan Kerajaan Persekutuan telah bekerjasama rapat untuk membawa faedah sosio-ekonomi.

Kestabilan

Langkah seperti itu, kata Dr. Lim akan membawa kepada perkembangan ekonomi yang lebih besar demi kepentingan rakyat negeri ini.

Dalam hubungan ini Dr. Lim yakin rakyat negeri akan senantiasa mengukuhkan keselamatan, kestabilan dan keamanan negeri melalui muhibbah, persahabatan dan keharmonian yang sedia ada.

Dr Lim berkata, kita juga haruslah berwaspada tentang anasir-anasir anti nasional dan subversif yang cuba memecahkan struktur masyarakat kita.

Ketua Menteri Pulau Pinang yakin di bawah pimpinan dinamik Perdana Menteri Datuk Seri Dr. Mahathir Mohamad dan Timbalan Perdana Menteri, Datuk Musa Hitam, Malaysia akan membuat kemajuan yang pesat bagi matalamat yang dirangka untuk kemajuan negara dan rakyat.

Bahan asal dari Arkib
Negara Malaysia